

開放文學 – 歷代筆記 – 夜雨秋燈錄
接錄和張少卿花燭詞

讀夢蕪庵主賦滇南張小伊觀察娶吳門張少卿校書花燭詞，感成七言絕句八首，聊以記事。
六郎自昔擅佳名，佳話而今倍有情。
一續鸞膠傳盛事，從教四海豔卿卿。

象服輝煌穩稱身，花冠掩映面羅新。
燦然珠履盈門客，一笑新人是故人。

阿母今春新嫁娘，歸來料簡女兒裝。
紅氍毹繡雙雙拜，如此東牀喜欲狂。
(少卿之母，白髮垂矣，今春挾厚資別擇嫁，亦異聞也。)

明珠不費麗姝來，天假奇緣卻自媒。
妾驟貴時郎驟富，纏頭金翠滿妝台。

檀板金尊舊侶攜，下風羞澀判雲泥。
至今□倍青樓價，不肯從人作小妻。

好好原來是一家，鍾情底事說閑邪。
願今永比鸚鵡翼，莫踵前人怨落花。

曾聞金屋舊藏嬌，蓬梗無端斷復飄。
料得華堂花燭夜，有人珠淚泣鮫綃。

郎君官貴錦衣游，萬里鴛鴦得自由。
太息滇南征戍士，幾時解甲問衾裘。